



La regenza ha disponi davart l'aua restanta da las Ovras electricas Alvra-Landwasser SA.

LO

Aua restanta – promoziun da sport – scolas medias

Dallas tractativas da la ultima sesida da la regenza grischuna

■ (cc) En sia ultima sesida dispona la regenza grischuna la sanaziun da l'aua restanta da las Ovras electricas Alvra-Landwasser SA. Ultra da quai metta ella en vigor la lescha per promover il sport sco er la revisiun parziala da la lescha davart las scolas medias.

La regenza ha disponi la sanaziun da l'aua restanta da las Ovras electricas Alvra-Landwasser SA (OEAL) sco ch'ella vegn prescritta da la lescha. Tras quai vegnan las OEAL obligadas da dotar da nov – tut tenor la stagiun – las tschiffadas d'aua da la Landwasser a Glaris, la tschiffada da l'Ava da Tuors a Bravuogn sco er las prelevaziuns d'aua da l'Alvra a Bravuogn ed a Filisur. Tar las tschiffadas main impurtantas ord vista ecologica da l'Aual da Monstein, da l'Ava da Tisch e da l'Ava da Stugl vegni desistì da prender mesiras da sanaziun, e quai en il rom da la consideraziun cumplessiva.

Las mesiras da sanaziun ch'èn vegnidas fixadas uschia dattan ina impurtanza prioritara als aspects da la pestga. La proposta da sanaziun è vegnida sviluppada tras ina vasta gruppa da lavur (maisa radunda), da la quala han fatg part tut ils posts spezialisads chantunals pertutgads,

las vischnancas concessiunaras, la gestiunaria da las ovras electricas sco er representants da pliras organizaziuns per la protecziun da l'ambient.

La disposiziun da sanaziun per las OEAL permetta da far in ulteriur pass impurtant en connex cun las sanaziuns da l'aua restanta en il Grischun. Per 155 da totalmain 224 tschiffadas d'aua è la sanaziun da l'aua restanta ussa liquidada ubain datti soluziuns da princip. Las ovras electricas respectivas cumpiglian passa 75 per tschient da la produziun totala dal chantun.

Ulteriuras infurmaziuns sut:
Uffizi d'energia e da traffic dal Grischun

La lescha per promover il sport vegn messa en vigor

La lescha davart la promoziun dal sport e dal moviment (lescha per promover il sport) vegn messa en vigor per il 1. d'avust 2015. Ultra da quai vegn relaschada l'ordinaziun davart la promoziun dal sport e dal moviment. L'ordinaziun per promover il sport regla tranter auter la surdada da contribuziuns finanzialas a purschidas dal sport da scola voluntar. I vegn mede-

mamain francà en l'ordinaziun, en tge furma ed a tge gruppas da persunas ch'il premi da sport grischun vegn surdà.

En in ulteriur pass vegn elavurà in concept per promover il sport. Quest concept è la basa per futuras decisiuns da la politica da sport e regla per exempel la collavuraziun tranter il chantun, las vischnancas e persunas privatas. Il concept per promover il sport vegn fatg en moda interdepartamentala ed integrond las organizaziuns da sport grischunas.

Revisiun parziala da la lescha davart las scolas medias

La revisiun parziala da la lescha davart las scolas medias en il chantun Grischun dals 22 d'october 2014 vegn messa en vigor per il 1. d'avust 2015. La revisiun parziala rinforza financialmain las scolas medias privatas. Principalmain vegn reglada da nov la finanziaziun da las scolas medias privatas sin fundament dals custs d'ina scolara u d'in scolar da la scola chantunala grischuna. I vegnan introducidas diversas pauschalas sco per exempel ina pauschala da talent. En consequenza da questa revisiun parziala relascha la regenza differentas ordinaziuns.



Il sustegniment a las scolas medias privatas vegn rinforzà.

LO